

# Ostermoondaach

Omm Ostermoondaach hawwe merr omm Stommdisch gesetze, de Karl, de Schorsch unn isch unn hawwe uns iwwer de Sunndaach unnerhalle. Jeder vunn uns dut iwwer su enn Daach mett soiner Familie joo was onnersders mache unn dessdeweese hott-merr vill driwwer ze schwätze.

Habbderr aach eier Eier sellwer gefärbt?, frächt de Karl, bei uns war die Sach johrelong oigeschloofe, awwer weil unser Enkel su gern gefärbde Eier esse, dut die Fraa widder enn Haufe Eier färwe. Unn ich esse se halt aach gern.

Weil die gefärbde besser schmegge dun als die weiß gekochte, seet de Schorsch, isch kann merr nitt helfe, awwer dess iss su, isch waaß nitt warum.

Isch saach: Doo hosde recht, Schorsch, isch moon, dess kimmt doodefoo, weil merr seet, aach dess Aache dut mettesse. Dess iss joo bei onnern Gerichte genau su, wenn-se schee uffem Deller liehn, duts vill besser schmegge.

De Schorsch hott genickt. Merr misst emol enn Test mache: Die Aache zubinne unn donn e gefärbt Ei unn e ungefärbtes hinnernonner in de Mund stegge, donn deet merr wisse, obs tatsächlich enn Unnerschied mache dut.

No ja, moont de Karl, mach dess emol unn donn dusde uns omm nächsde Sunndaach driwwer verzähle. Wie iss dess eischendlich mett dene Ostereier? Unn mett dene gefärbte Eier? Wie long duts donn su ebbes schunn gewwe?

Isch waaßes nitt, habb isch gesaad, merr misst emol driwwer noochlese.

Doo seet de Schorsch: Mir kriehn doch allsfort su kostenlose Blättcher in de Briefkassde geschmisse. In su oom Blättche habb isch gelese, dasses schunn e paar hunnert Johr her iss, dasses onn Ostern Eier unn donn noch gefärbte gewwe dut. Villeischd hott dess doodemett ze due, weil doomols onn Ostern noch koo Tulwe unn aach koo Kerrschebeem gebliehd hawwe, unn weil de Mensch nooch emm Winter halt endlich ebbes Bunes sehe wollt, hodder halt die Farwe uff die Eier gemold, als Ersatz ferr die bunte Blumme.

Isch saach: Im Flerschemer Blättsche war joo vor Ostern de „Osterspaziergong“ vumm Geedee ze lese, der hott gedichd: „Aber die Sonne duldet kein Weißes.“ Unn weider: „Doch an Blumen fehlts im Revier, sie nimmt geputzte Menschen dafür.“

Ja, hott de Karl gemoont, su isses villeischd gewese. Unn dessdeweese färwe mir heit noch die Hinkelseier. Unn wenn merr mol Urenkel hawwe, donn wernse aach wider im Gadde versteggeld.

Doo seet de Schorsch: In dem Blättche hott aach gestonne, dass su e Ei e Symbol iss ferr die Auferstehung. Unn dess iss joo eischendlich dess Wischdischsde onn Ostern.

Recht hosde, habb isch gesaad, mir duts immer widder su komisch iwwer de Buggel laafe, wenn isch vumm Parre heern due: „Christ ist erstanden!“

De Schorsch hott genickt unn de Karl aach, unn donn warn merr enn Aacheblig still, hawwe unsern Äbbelwoi gedrunke, bis de Schorsch uff oomol gesaad hott: „Christ ist erstanden!“ Was su drei Werrder doch ferr e Kraft hawwe.

Unn de Karl seet: Unn was ferr Zuversicht die gewwe.

Isch habb die zwaa oogeguggd unn habb gesaad: Ihr Männer, ei su habb isch eich joo noch niemols redde geheerd, ess iss doch Ostermoondaach unn koo Pingsde!

Eiern Honnes